

Greiflet 2014 in Brunnen

Plöder zwüschet em Gastwirt Walter vo Brunne
und em Chrigel vom Wichäli

- W Guete Abig midenand, gälid ich bi e chli e fräche
Ich tuen üch doch sicher bim ei-fone underbräche.
Es isch doch hüt Mode und ghört zum guete Ton
Me stieret jedi frii Minute in e sones Glotzofon.
- C Überall wo jung Lüüt sich bewegid & tönd ufhalte
Tönd vorallem d'Smart-Phone de Tagesablauf gestalte.
Me gsehd weder linggs nu rächts, kei Kollege, kei Natur
Im Bus, im Zug, i de Pause, ja überall, eifältig und stur !
- W Ja, das isch scho die trurig Normalität wo me hüt gsehd
Es isch doch a jedem glich, was um eim ume gschehd.
Käni Gspräch, s'wird nur nu i de digitale Wält diskutiirt
Es isch allne füdleglich, was i de reale Wält passiert.
- C Ich frage mich wider, wo bliibt uf dere Wält de Fride
Halb Afrika isch im Chrieg, es wird gmordet und vertribe.
Millione sind uf de Flucht, mönd ihres Deihme verlah
Schlimm isch: immer wider müend Flüchtling z'Läbe lah.
Da muess ich scho fescht a Nelson Mandela dänke
Der hed gwüsst, Hass und Eländ erfolgrich z'bekämpfe.
- W Die ärmschte vo de Arme hets wider emal bsunders troffe
Ja, uf de Philippine isch d'Hilf nur ganz zögerlich aagloffte.
Mier gahts nid i Chopf ine, ich han e Riisemüeh z'verstah
Dass die ganz Wält nid schnäller und effizianter hälfe cha.
- C Nova Brunnen, das isch hüttigstags z'Thema Nummere eis
Aber wo gahd de d'Strass dure, bring mer eine wo das weis.
Ich meinti, de Glanz vo Nova Brunnen isch e chli verblasst
Z'Ingebohl hets scho es Hochhus wo guet det hindere passt.
Ja, und wenn jetz z'Schwyzherhusli nu würd massiv ufstocke
De wär er nid elei, hätt es Gschpänäli, der eländ Mocke !

- W Alig hets gheisse, d’Amerikaner chöngid alles besser mache
Was det passiert isch, isch ehnder zum brüele als zum lache.
De Staat isch bankrott, die Aagstellte müend Ferie näh
Es wär interessant, wenn’s das bi üs au einisch würd gäh.
- C Ich meinti: gar nid schlächt , me chönnt’s sauft usprobiere
Hed sich der Ürsel ächt wäge dem vorziitig la pensioniere ?
Stürrächtnige chämtid käni meh, chönntsch de Chlotz vertue
Ja, und Parkbuesse gäbs au nümme, das chämt de nu dezue.
- W Öppis isch aber, und das wär eini vo de truurige Gschichte
Stell der vor, d’Seepolizii müesst ufs Kaffestübli verzichte !
De ganz Tag ufem See ume gondede isch halt nu stressig
Doch es guets Aug am rächte Ort macht de Job scho lässig.
- C Am Nüssler-Jubi hend sich d’Nessi au derfä presäntiere
Si sind e chli wenig gsii, hend si aber nid welle schiniere.
Me hed Statische iigsetzt, dass e au e chli e Falle macht
Zwee devoo hend der Uftritt ganz guet hinder sich bracht.
Nur eine hed die guete Regle vom Playbäck tüchtig verletzt
De Daniel hed z’Mundstück a de Trompete gar nid ufgsetzt.
- W Ja, d’Nüssler hend scho es Super-Fäscht uf d’Bei gstellt
S’isch kool gsii, hed guet rändiert, das isch ja das wo zellt.
Sogar ufem Schlussreisli hed me gluegt e chli z’spare
De Schnaps zum Kafee hed z’ganz OK sälber müesse zahle.
Zum Usklang hed me de nu es paar Gin-Tonic konsumiert
Die einte heigs ufem Heiwäg mäni tüchtig umegrüehrt.
- C Z’Eidg. Schwingfäscht isch all Jahr meh Chilbi & Ballermaa
Da chasch du vo Bare, Bierzält und Sex, ja wirklich alles ha.
Viel hend mäni gnueg vo dem feine Gärstesaft verwütscht
Am Sunntig uf de Tribüni hed de Nori gar nümeh gnützt.
- W Im Badhüsli hinne git’s Zoff, näme es Dächli isch im Spiel
Ja, und es paar Schwärtlig heigs äbe au nu grad z’viel.
Die lustige Zwärgli sind au nümme det im Gärtli hinne
Sie hend fort müesse, si stiengid im Gmeindsgarte inne.
Bim Parkplatz hends au nid anepasst, das chame ja danke
Tüends ächt z’Personal vo de Verwaltig z’fescht ablänke ?

- C Blase isch e nüue Begriff, hed hütigstags grosse Stellewärt
 Es blaset uf de Strass, i de Gärte au det womes nid begährt.
 De Dräck wird i See, z'Heu vom Urmibärg obenabe blaset
 Wenn das nu zueniid, wird einisch e Bläser nu vergaset.
 De Choller het's mit sym Lufthüeler gäge Föhn welle ufnäh
 Nachere Stund hed er de der Läärlauf realisiert und ufgäh !
- W Ei Samichlaus isch si bim lychauf näme e chli vergange
 Nu gliieinisch sind dem nämli d'Mandariindli uusgange.
 Bim Zuechlauf hed er de Orangsche verwütscht, oh Graus
 Ab sofort heisst's jetz alig „sind so guet liebe Samichlaus“.
- C Im Timpel obe lauft's nid rund, e Situation wo me ja kännt
 Im Herbst sind de Zick und der Ueli, behd säme aa'brännt.
 Pilz hättits welle ga sueche, hend aber müesse dunne bliibe
 Bim schlächte Wätter heisst's, tägid si z'Bähnli nid betriibe.
 Die zwee hend gemeint, das sind doch afig fertigi Spinner
 Hoffentlich gaht's de z'nächschte Jahr midem Bö de ringer.
- W Nach de Nessi-Taufi hed de Rolf chum meh es Bei aagstellt
 Das er sicher is Gästebett chunnd hed me de es Taxi bstellt.
 Als Dank hed er midem Schofför nu es feins Jointli zelebriert
 Wo de d'Rächnig cho isch, hets de Gascht schier überrüehrt.
 Das isch scho grad e chli dicki Poscht hed de Rolf gfunde
 „Fahrt & Betreuung eines Betrunkenen“ isch det gstande.
- C Im Winter chönnts d'Bure e chli vo de rüehigere Syte näh
 Das tued denaa eim Ideeä für anderi Beschäftigunge gäh.
 Der eint hed e Mini-Schiischuel betriibe, e schlaue choge
 Er hed d'Gofe im Schlitte midem Traktor im Züg ume zoge.
- W Am Louis sys Gschäftsauto isch alt und usrangschiert
 Die Schwarte nu vorzführe, heder si de doch schiniert.
 Nu glii hed de Göppel d'Schwiiz i Richtig Jugoslawie verlah
 Blöd isch nur, är hed de Husschlüssel im Chare inne glah.
- C De Charly & de Marco gsehd me esie einisch im Usgang
 Uf Reide abe sind sie au, sie liebidi nämli de Jodelgsang.
 D'Heifahrt isch de ehnder worde zunere lange Reis
 Zerscht sind's z'Goldau geweckt worde, ufeme Abstellgleis.
 Z'Brunne isch de Marco nid us sym Tiefschlaf erwacht
 So hend die bede halt nu der Umwäg über Sisige gmacht.

- W Hätztröpfli und Pille sind im Usland billiger ghört me säge
Das hed eine usgnützt, ja der isch det dure nie verläge.
Dersälb schlau Chäufer hed aber e chäche Verlust erlitte
Er hed der Pillesack scho i der erste Beiz inne la ligge.
- C Am Walti tued e Autofahrt i Süde immer viel bedüüte
Da tued im Gotthardtunnel inne plötzli z'Händy lüüte.
Es isch nid mys und nid dys, ich tue doch nid spinne
Es isch käs Händy gsii, nei, de Wecker i de Goffere inne.
- W D'Rita isch midem Auto i Herrebode ufe ga schaffe
Da isch eine vorere anegfahre, isch schier vertschlafe.
Mid Volliecht und Horne hed si unbedingt welle verbii
Das hed 40 Stei gghostet, es sind äbe 2 Polizische gsii !
- C Vo Stalking tued me i letschter Zyt eminänt viel ghöre
Äbe, wenn eini d'Prominänz mid telefoniere tued störe.
Ich wirde esie au gstalket, ich liide au eländ da drunder
E so vo de Swisscom, Sunreis und nu anderem Plunder.
- W Ich weis, wer die Mode hed, eini devo isch my Frau
Wenn ich öppe vertschlipfe , stalket si mich alig au
Ich hoffe nur, dass änes nid hüt scho wider passiert
Dass si scho vor de Drüüne i Stauffacher ufe telefoniert.
- C Jetz höremer uf mit stalke und Lüüt verruckt mache
Es gid i üsem Läbe doch zähtuusig viel schöneri Sache.
Mier chönnd enand viel Guets z'lieb tue und schänke
Gällid, tüemer z'Jahr us esie einisch da draa danke !

Greiflertanz

Nach dem Plöder findet im **Restaurant Stauffacher**
der Greiflertanz statt.

Ab 21.00 Uhr Musik und tolle Greiflerstimmung
mit Quartett Tanzboden

Auf guten Besuch freuen sich die Musikanten, die Wirtsleute
und die Greiflervereinigung Ingenbohl-Brunnen